


Parada di Noord semi luhoso pero cu bon ambiente

ORANJESTAD(AAN): Si bisa cu parada di mucha di Noord tabata luhoso, esaki lo no ta corecto. Por bisa cu tabata trata di un parada semi luhoso, sin embargo masha bunita, den cual e grupo di Homenahe na pintornan di Aruba sigur a resalta, y tambe pa su originalidad, d polisnan di Trafico di School preparatorio di Washington. Precioso tabata e grupo di Calabas, Fantasia di Parha, principalmente su roadpiecenan cu tabata un maraviya pa mira. Loke tambe tabata simpel y representable pa un parada di carnaval di mucha ta e grupo di Dalmations di Emy Angela, demostrando con por participa simpel y toch luci den un parada di carnaval.

No por keda sin menciona e grupo masha original di Titi tromp, Stima nos cultura y principalmente su carosa cu faro, Willem III toren y e casita Arubano tabata masha tipico.

Esun cu en verdad a luci



manera un reina di e parada aki tabata e Ice Princess cu su roadpiece, e ganadora di PRince and Princess Costume 2001.

Club Movimento a bini tambe mas simpel e aña aki, cu un carosa..

Por a goza di Hoffie Prikitchi cu Fantasia di Color, y Nos Fantasia cu Herencia di nos Indiannan, cu den parada di mucha di San Nicolas tambe a cumpli admirablemente. Fantasia di color cu un carosa y 4 road-

piece ademas, mientras cu Herencia di nos indiannan a presenta cu dos roadpiece cu tabata e "canica" y e cueva di Guadiriquiri. Bunita tabata e carosa di Caiquetio. Por a goza atrobe di Jacintha kleuterschool cu su 3333

Deseo y su carosa di genienan. AJMG e aña aki tabata tin Fiesta den Hoffie como tema y cu solamente miembronan sin carosa of roadpiece y un soundsystem y Creators como musica.

Di e bandanan den parada por a scucha Robert y su SOlo banda Show cu a zona bon, Sly fox Disco, Original Band, Zodiac Band cu un biaha mas tabata topico di conversacion pa su zonido hopi bon y harmonia di instrumentonan y animacion, BMW, TIGO cu cantidad di speaker sin embargo no a saca e zonido cu lo mester por tin, Creators, Daniel Disco y Gemini Disco y finalmente Dushi Band.

E parada di Noord atrobe a resulta e parada di placer y diverticion, cu bunita gruponan, bon musica, y anima masha hopi pa publico. Varios di e gruponan aki a uni ayera den grupo di Centro di Bario Noord cu a participa tambe den parada grandi di mucha na Playa.

Carnaval

PARADA DI CARNAVAL NA NOORD

REINA INFANTIL NO A HABRI PARADA DI NOORD

Diasabra durante parada di Noord por a mira cu e reina infantil di carnaval 2001 Chanelle Fortin no a habri e parada. Mesora a surgi e comentarionan ta pakico esaki tabata. Buscando informacion DIARIO a bin haya sa cu tabata tin algun contratiemponan cu e presentu cu mayornan a dicidi ta mihor no laga Chanelle bay Noord pa e parada y keda descansa ya cu anochi si el a presenta na Lighting Parade, y pa ayera e habri e parada como Reina di Carnaval infantil 2001.

RECLAMO PA KAVEL NA NOORD

Hopi hende sa cu na Playa nan ta busca permiso pa bin na remarke pa un kavel, pero nunca tabata cu na Noord "supuestamente" ta e caso?

For di tempran algun famia y conocir a para 2 auto na un lugar na Noord y e Diasabra mainta ey ningun hende a bin reclama cu ta nan lugar y cu no mag di para eynan. Ta te den oranan di atardi cu un persona a cumenza haci "un poco" fastioso reclamando cu e lugar ta di dje y cu otro aña e personanan aki mester busca un otro lugar pa para. Shonnan ta asina bo ta bay wak carnaval pa bo goza di dje y inocentemente bo ta hayabo den problema sin sa kico ta kico, ya cu segun parecer te ainda na Noord no ta parti kavel.

AWOR TA MUHER TA BRINGA CU MUHER

Un mahos bista Diasabra na Noord ta ora bo weita 2 muher ta bringa cu otro. Ta ki imagen e muhernan aki por duna e muchanan ora nan ta bringa den cara di e inocentenan aki. Muhernan si ta problema

boso tin cu otro, busca un otro caminda pa regla e asunto, pero no dilanti di un multitud di mucha cu a bay pa goza di e carnaval di Noord.

BAILENAN VULGAR

Ki cancionnan mas excepcional bandanan ta tocando ultimamente, y mas peor e baile cu tin cu ne. Hopi di e muchanan no sa kico e significacion di e baile ta y ta baile como si fuera ta algo bunita nan ta haciendo. Pero pa e grandinan cu si ta compronde e baile aki ta haye masha mahos y no ta compronde cu bandanan ta saca cancionnan asina pa bin un baile asina vulgar pa e muchanan. Ta di spera cu e bandanan tene cuenta cu awendia tur locual e muchanan mira nan ta imita e grandinan y sigur esaki no ta un bunita imagen pa e futuro generacion cu despues di tempo ta bin compronde ta kico nan tabata bailando.

ALCOHOL TA HUNGA UN ROL GRANDI BAO HUBENTUD

Awendia por mira e hubentud ta cumenza bebe for di tempran. No ta importa e edad y ya caba nan ta cu botter di alcohol na boca. Tanto mucha muher como mucha homber ta consumi alcohol y hopi di nan despues no ta responsabel di nan actonan. Tanto Diasabra atardi na Noord, Diasabra anochi na Lighting Parade y ayera na Parada di mucha na Playa por a mira un cantidad di jovennan consumiendo alcohol y despues ta cumenza bringa cu otro ya cu nan ta cumenza bira agresivo y no tin control di nan mes. Un consejo ta bay na e juventud: bo no mester bebe pa bo goza di un actividad, goze concientemente y brinda respet pa bo tambe ricibi respet. Sea semper bo mes y no laga otronan influenciabo riba bo actonan.



